



Zwelfte Joorgang

Fasnacht 2009

## Die Gsalzene

An dr GV vo de Sioux im Indianerreservat

Said dr Haptlig «Fetter Elch» zem Haptlig «Kleiner Kopfsalat»:  
«Dass Du vo mir so lang nyt gläase hesch duet numme dodraa ligge:  
Syt däm bleede Rauchverbott kanni kai Noochrichte mee schigge!»

D' Frau Calmy Rey wott bim Iran-Bsuech d' Landessitte reschpäggtiere  
Drum duet si ires Kepfli mit em Kopfduech vorschriftsmäss kaschiere  
Jetz hämmer Angscht die wänn uns fyr dr Gegebsuech au imponiere  
Leen ire Fraue uf de Kepf Gschrübb à la Widmer-Schlumpf montiere

Vor dr Kyschte vo Somalia rief dr Bootsmaa voller Schregge:  
«Pirate kemme, mir mien d' Schwyzer Grenadiere wegge!»  
Dr Käptn maint: «Setz nur Signal, dass me by uns nyt hole kaa  
Do isch d' Faane vo dr UBS, häng die an Maschte draa!»

Bisch z' bleed zem Leere und kunsch mied in d' Schuel, vergissisch z' Morge nää  
Scho stoot dr Eymaa vor dr Diire, duet dr satti Buesse gää  
In Ziiri gäbe so Sanggtione kuum e zusätzligge Gwinn  
Die sinn bekantligg scho gnueg gstroofft drmit, dass si Ziircher sinn

D' Ruum-Station im Wältall wänn jetz au scho Fraue rebbariere  
Kurz druffaabe duet die Erschti d' Wäärggzyygdäsche scho verliere  
Worum hett sich denn das Myysli nid noch dääre Däsche buggd?  
Sunsch hätt ere dr Helm die neii Duurwälle vrdruggd!

Bim Olympiabsuech hänn uns d' Chinese bsunders imponiert  
Iri Hindli die sinn vellig in d' Famyylie integriert  
Und die luege druff, dass iri Viicher zämme harmoniere  
Gwissi kasch halt numme breetle, andri sottsich ender fritiere

D' Regierig wott dr Abschied Schneider / Lewin feschtligg zelebriere  
Und muess dodrfyr e satti Stange Gäld organisiere  
D' Eva Herzog maint gelasse: «Do bestoot jo gar kai Drugg  
Vom Schuemacher sinre Orgie kunnt no s' Fläschedepot zugg!»

«So, zerscht bsuech I s' Internet fir sexuelli Eskapade  
Dernoo griegt d' Frindyn ains an d' Leffel, denn I bi mächtig verlaade  
Noochhär gang I minre Noochbere go d' Underhoose stääle  
Denn goot's ab in Generalstab – d' Schwyzer Druppe go befääle!»

Dr neii Naggdscanner in Ziiri-Klote isch e dolli Sach  
Wär am Bildschirm sitze derf dodrumm git's allewyyle Grach  
Doch s' Vergniege hett au Gränze letschthi heersch dert aine brumme:  
«S' isch scho guet Frau Martinetti, bitte geen si ussunumme!»

## Monschervärs

Bluffer mit Aazug und Grawatte  
Nit grad die hellste uff dr Blatte  
Unverschämti Gäldversängger  
Dä Värs befasst sich mit de Bängger

66 Mia Frangge  
Derfir duet d' UBS brav dangge  
Doch dr Kurer maint: «'S längt noni  
Fir d' Uuszaalig vo de Boni!»

Dr Ospel hett ganz ungeniert  
Si Hindli Wuffli brotegiert  
Dr CS-Big-Boss Brady Dougan  
«Tut nur für seinen Bonus lugen»

Uff Hundehitte – ai wie schreeg  
Git d' City-Bank e Hypothek  
Und Lehman Brothers gheert zue jeene  
Wo sogar haissi Luft beleene

Fir alli biirewaiche Wintsch  
Griegsch Kapital vo Merrill Lynch  
Als Sicherhaid e Hampfle Drägg  
Scho hesch Kredit bi Freddie Mac

D' Amis hänn rächt ungeniert  
Die ganz Finanzwält ruiniert  
D' Konsequänze vo dem Fauxpas  
Sinn ganz verschieide in Europa

D' Isländer mien zem Batze bhalte  
Geysire und Vulkän abschalte  
Und wäg de Hypothekesinde  
WGs mit Pinguine grinde

Wenn de Russe d' Schulde stingge  
Griege d' Bängger Betonfingge  
D' Rumäne hänn kai bitzi gesteent  
Die sinn sich Bluetsuuger jo gweent!

Vellig egal ischs de Usbeke  
Uff Zält gits kaini Hypothek  
S' glyche gilt fir d' Ukraine  
Dert sins nid Zält – dert sins Ruine!

De Niederländer kunnts gar gläage  
Die woone maischtens in Woonwääge  
Kai Schade gits au bi de Pole  
Will was die hänn isch eh scho gstole

Die Situation kennt eskaliere  
Wie sotti d' Schwyz druf reagiere?  
'S git nur ai Wääg us dääre Not  
Die Gsalzene in Bundesrot!